

Q. D. B. V.

DE

ULTIMA
VOLVNTATE
ADPROBATIONIS
ET CONSENSVS
INDIGA,

DISSERTATIO IVRIDICA INAVGVRALIS,

QVAM
EX DECRETO

INCLITI ICTORVM ORDINIS

PERANTIQVÆ HVJVS HIERANÆ,

PRO GRADV DOCTORIS

D. XXVI. MAJ. A. M DCC XLVI.

PVBlice DEFENDET

JOANNES DAVID STENGER,
ERFORD.

ERFORDIÆ,

TYPIS JO. CHRISTOPHORI HERINGII,
ACAD. TYPOGR.



REVERENDISSIMO
ET
ILLVSTRISSIMO DOMINO,
DOMINO
ANSELMO
FRANCISCO
ERNESTO
LIBERO BARONI
DE WARSBERG,

ECCLESIA RV M METROPOLITANAR VM ET CA-
THEDRALIV M MOGVNTINÆ, TREVIRENSIS
ET SPIRENSIS CANONICO CAPITVLARI, ET
RESPECTIVE PRÆPOSITO AC SVPREMO CHO-
RI-EPISCOPO, EMINENTISSIMI ET CELSISSI-
MI PRINCIPIS ELECTORIS MOGVNTINI CON-
SILIARIO INTIMO, AC CIVITATIS TER-
RITORIIQVE ERFVRTENSIS PRO-
PRINCIPI,

DOMINO MEO GRATIOSISSIMO.

REVERENDISSIME
ET
ILLVSTRISIME
PRINCEPS,
DOMINE GRATIOSISSIME!



*I*nter virtutes, summis, quibus gubernacula imperii concredita sunt, imperantibus, quam maxime dignas, gratia & justitia aliis palmam praeipit, gratia enim afflictos erigit, mæstis praesidio est, ac bene merentes condignis afficit premiis, justitia illis, quibus quod sibi debetur, vel demitur vel non tribuitur subvenit, hanc ob causam respublica
ejus-

ejusmodi imperantibus gaudentes, non possunt non, quin
sibi de fortuna sua quam maxime gratulentur. Ejusmo-
di fortune Erfordia quoque nostra ex eo tempore est
compos facta, quo TE, REVERENDISSIMUM
ET ILLUSTRISSIMUM PROPRINCIPEM
in amplexus suos recepit, siquidem nihil eorum intermi-
ssisti, quæ ad salutem patriæ conservandam & amplifi-
candam spectant, adeo ut salus nostra publica quotidie
majora capiat incrementa, ita, ut qui numerum earum,
quibus emines virtutum recensere velit, eodem modo te-
merarium susciperet laborem, uti ille temeritatis notam
incurreret, qui stellarum numerum inire vellet. Hac
mecum devoto sub pectore perpendens, & exploratum
habens, omnium virtutum cumulum, in pectore TVO,
quo nihil est augustius, sedem perpetuam fixisse, illarum
admiratione captus, a me impetrare non potui, quin the-
ses meas, arido licet pumice exaratas, summa mentis de-
votione TIBI offeram & ad pedes TVOS deponam,
sperans, fore, ut conatum hunc in meliorem interpretatu-
rus sis partem, rogansque simul, velis hæc theses, ut obse-
quii humillimi tesseram acceptare, illasque TVA tutela
dignari. Quibus impetratis, sempiternas ad Deum fun-
dam

*dam preces, ut servet TE REVERENDISSIMVM
ET ILLVSTRISSIMVM PROPRINCIPEM,
ut summa virtutis ingens dulcissimumque spectaculum, in
Nestoreos, quos bene mereris, annos, saluum ac incolu-
mem, quo fiet, ut subditorum salus ad summum fastigium
perducta, NOMINI TVO ILLVSTRISSIMO
aere perennius monumentum sit in sculptura, quod in vo-
tis habet*

REVERENDISSIMI
ET
ILLVSTRISSIMI
NOMINIS TVI

cultor humillimus

JOAN. DAVID STENGER.



DE
VLTIMA VOLVNTATE
ADPROBATIONIS ET CONSEN-
SVS INDIGA.

PROOEMIUM.

Germani si perstitissent in simplici il-
la sanæque rationi maxime conve-
nienti suarum successionum for-
mula, quam TACITVS tradit de
Mor. Germ. C. 20. §. 6. in verbis:
heredes successoresque sui cuique liberi & nullum
testamentum. Si liberi non sunt proximus gra-
du in possessione fratres, patrui, avunculi, &
hodie vacui essemus innumeris illis litibus,
quarum quidam testamenta haut absque ratio-
nibus farraginem appellant; quum autem hic
litium fomes non potuerit non unacum illa sat
grandi

grandi juriū Latii nube, qua tandem effectum, ut Germania, scriptarum olim legum defectu laborans, nunc earum gravissima mole prematur, teste CONRING. *de Or. Jur. Germ. C.34.* in fora eorum, alioquin omnium ambagium inimica, irrepere, patriaque nostra sibi in peregrinis hisce juriſibus placeat, prima ubique eſto cura ſecernendi & ſeparandi inſtituta ab invicem, quo Romana Romanis & Germanica Germanicis decidentur & judicentur ex fontibus, ideo & teſtamenta, quæ ex opinione inſignis illius patrii juriſ ſcrutatoris & reſtauratoris SCHILTERI *Exerc. ad D. 2. §. 14. Ex. 8. §. 49. Ex. 9. §. 8. 9.* ante ſeculum quintum decimum in Germania ſerme ignorata ſunt, tamquam inſtitutum Romanum, ex alio quam Romano jure æſtimari nequeunt, ſalva tamen ubique differentia, qua patrimonium civis Romani & Germani nimium quantum diſcrepant, ac proinde Imp. Maximil. I. in Ordin. Notar. de an. 1512. notarios ad nulla alia niſi Latii jura in conſciendiſ teſtamentiſ ablegare potuit, quæ & prima ſunt norma, ad quam opuſculum hocce conſtruatur.

§. I.

De Etymologia inscriptionis & quid sit, de quo hic agendum, quædam dispicere & definire methodi rationes jubent. Rubrum ipsum docet, ultimas voluntates, omneque quod earum rationem habet, objectum tractationis esse. Haut inconcinne describenda videtur ultima voluntas generatim, quod sit voluntatis nostræ iusta sententia, de eo, quod quis post mortem suam fieri vult, ut dicit *L. 1. de testam.* quamquam hæc *L.* solummodo testamenta in specie ita definiat, ex quo consequitur, hic non solum de testamentis, quatenus in strictiori significato accepta, codicillis aliisve disponendi modis minus solennibus opponuntur, sermonem esse. Quot sint ultimarum voluntatum species, discrepant admodum *Dd. GIPHANIUS ad L. ult. C. de Codic.* de denario earum numero, sed absque fundamento persuadere vult, hoc tamen certissimum, omnium ultimarum voluntatum primariam speciem esse testamentum, in quo definiendo post tantos interpretum greges desudare idem esset ac sidera addere cælo. In genere autem describitur, quod sit legitima declaratio de futuro herede a testatore habili facta, heredis enim institutionem esse animam & characterem testamenti, eaque corrumpente & reliqua ejusdem capita corrumpere, nec dupondios latet, æque ut variæ testamentorum divisiones, quarum secundum jus novum, (nam tempore originis testamentorum hæc divisio monstrum haut absimilis fuisset, ex rationibus, quas habet *BYNCKERSH. Obs. II. 2.*) facile prima est in publica & privata, prout nempe illa fide & autoritate vel publica vel

privata nituntur, quarum illa in principe & magistratibus a principe creatis conspicua, hæc autem in honestis viris publicum officium haut administrantibus quærenda, proindeque testamentum publicum ex jure Codicis, nam in D. hujus testamentorum speciei nec vola nec vestigium extat, est quod aut principi offertur ab eoque acceptatur, prout sancitum in *L. 19. G. de Testam.* aut actis judicii insinuatur, hoc Dd. vulgo vocant oblatum illud insertum, quod precibus principi oblatis inferatur, eaque & absque testibus summi sunt valoris, nam testes non sunt necessarij ubi publica monumenta sufficiunt *L. 31. in f. de donat.* quam ob causam hæc *L. 19.* nervose dicit ea superare omnium testamentorum solennitatem. Ex his prono fuit alveo testamenta privata esse, quæ fiunt coram privatis hominibus, eorumque fide subsistunt, eaque subdividuntur in solennia & ordinaria, ad quorum confectiõnem omnes a lege præscriptæ solennitates stricte observandæ requiruntur, quorum formulas ex jure Rom. exhibet Ordinatus. Notar. de an. 1512. & minus solennia s. privilegiata, quibus vel omnes vel quædam solennitates remissæ, eorumque auctoritas privilegio in legibus stabilita est, *L. 21. §. 1. G. de Testam.* quo spectant testamenta militaria, parentum inter liberos, ad pias causas &c. Nec plane omittenda differentia, quam leges loquuntur inter testamentum proprie tale, quo indigitatur ipsa testatoris voluntas, & improprie tale, quo nomine veniunt ipsæ tabulæ & instrumentum, quo continetur illa voluntas, qui significatus est in toto fere titulo de testam. aper. item quando dicitur testamentum deleri induci aut cancellari

cellari *L. 2.3. D. de his quæ in testam. del.* Deinde sub nomine ultimarum voluntatum & reliquæ species dispositionum mortis causa veniunt, quales sunt codicilli, in quibus pleraque, quæ in testamentis disponi possunt, excepta maxime heredis institutione directa. Huc etiam pertinent legata & fideicommissa, quæ sunt quando vel tota hereditas aut ejus pars vel quota vel quanta verbis precativis ab herede directo relinquitur, quod dat differentiam inter fideicommissa universalialia & particularia, §. 10. *J. de fideic. hered.* quæ iterum sunt vel expressa vel subintellecta, sub prohibita nempe rei extra familiam alienatione *L. 38. §. 1. 2. 3. de legat. 3.* quarum specierum vero nulla confundenda est cum illis, quæ vulgo inter Germanos pro fidelcommissis habentur. Porro in hunc censum venit mixtum illud negotium, partim de natura actuum inter vivos, partim ultimarum voluntatum quædam trahens, nempe donatio m. c. quæ est quando quis mortalitatis cogitatione rem quamdam in alterum consentientem transfert. Nec usu caret communis omnium ultimarum voluntatum divisio, quod sint vel perfectæ, s. quæ requisiti in legibus solennitatibus & forma instructæ, vel imperfectæ, quæ his requisitis destituuntur, proindeque vel validæ vel invalidæ sunt, ex communi illa regula: forma dat esse rei *L. 12. C. de Testam.* Tandem adprobare idem est ac animi sui sententiam declarare, de re aliqua hæcenus gesta, simulque significare, quod in eadem acquiescere velimus, s. adprobatio est acceptatio spontanea alicujus rei. His in unum collectis, approbationem ultimæ voluntatis definitio, quod sit actus, quo

quis declarat, quod ultimam voluntatem ratihabere, acceptare, eidemque satisfacere velit. Quamvis & ad hanc adprobationem consensus adprobantis in genere accedat, necesse sit, attamen consensus hoc loco majoris ponderis causa separatim positus magis urgens quid continet, adprobatur enim id, quod quidem per se subsistere posset, sed effectum habere nequit, nisi alter conditionem oblatam acceptet, & adprobans nulum jus habet contradicendi, s. impediendi, quo minus alter disponat de re sua, quamquam in ejusdem arbitrio sit positum, oblatum sibi favorem aut injectum onus vel adprobare, vel repudiare: e contrario deficiente consensu ad ultimæ voluntatis confessionem necessario, hæc ultima voluntas statim ab initio nulla est, nisi forsitan suppletus ille consensus retrahatur ad tempus initii. Sic consensus curatoris in testamentis fœminarum ex statutis quorundam locorum causa est, sine qua fœminæ non possunt valide testari, eodem fere modo ut v. g. nuptiæ filiisfam. Romani absque patris consensu contractæ plane nullæ & illegitimæ erant, nec effectum producebant *L. 25. D. § 12. C. de rit. nupt.* porro adprobant plerumque ii solum, qui immediate per testamentum aut honorati aut onerati sunt, consensus vero regulariter a tertia quadam persona requiritur, consentire enim is dicitur, qui quando actum prohibere potest, illum non prohibet *arg. L. 2. 3. D. de nov. act. L. 83. §. 7. D. Locat.* & consensus frustra requiritur ab eo, quo etiam invito, actus perfici potest *L. 3. D. de R. I. L. 101. pr. de condit. & demonstr.* exempla rem declarant.

§. II.

§. II.

Quum igitur omnis adprobatio dependeat non nisi a libera adprobantis voluntate *L. 20. pr. D. de acqu. vel omis. her.* hujusce voluntatis declaratio accedat necesse est, quæ est vel expressa, vel tacita, & exinde oritur adprobatio vel expressa vel tacita. Illa est, si quis disertis verbis declarat, se ultimæ voluntati satisfacturum, sic si heres ex minus solenni s. injusto testamento stipulantibus fideicommissariis & legatariis promittit solutionem legatorum vel fideicommissorum *L. 23. C. de fideic.* aut actionem sibi contra testamentum competentem transigendo remittit, quod fit in herede, qui remoto testamento, ab intestato successurus esset, sed qui in ipso testamento institutus est. Tacita adprobatio est, quando quis hanc adprobandi, rati habendi adimplendive intentionem factis exprimit, intuitu quorum maxime respiciendum, num sint concludentia, i. e. quæ in aliam partem trahi nequeunt, qualia esse perhibentur, si quis ex ultima voluntate debita solvit *L. 8. §. 1. C. de inoff. testam.* Idem & de eo dicendum, si legatarius ad certam quantitatem vel speciem restituendam a testatore condemnatus, legatum, cui illud onus inhæret, exigit, quo ipso ad hoc præstandum validissime obstringitur *L. 70. §. 1. D. de leg. 2. MENOCH. Conf. 206. n. 95.* & in genere de omni eo, qui legatum vel fideicommissum intestamento relictum sibi oblatum acceptat, aut etiam nomine alieno ex libera voluntate petit, *L. 8. §. 10. L. 10. §. 1. L. 32. D. de in off. testam.* Hanc inter expressum & tacitum differentiam leges aperte loquuntur in successione tam testamen-

stamentaria quam legitima, nam heredi suo, licet ipso jure acquirat hereditatem §. 2. *J. de hered. qual. & diff. L. 11. D. de lib. & postb.* ex æquitate datum est, aut facto suo hereditatem suscipere & retinere, quod dicitur immixtio, vel eadem abstinere *L. 12. 71. §. 4. D. de acqu. vel omit. her.* itidem heres extraneus acceptat hereditatem vel expressis verbis *L. 77. D. de R. I.* quod vocatur in specie aditio, vel facto, quod dicitur pro herede gestio, §. ult. *J. de her. qual. & diff.* utrique tamen integrum est ostendere, facta sua non esse concludentia, sed alio quam heredis animo peracta, ita filio paternæ hereditati pro conservandis bonis maternis insistenti, Taciturnitas medium iter duo extrema, consensum & contradictionem *L. 142. D. de R. J.* hic regulariter non sufficit, sed vera declaratione opus est, nisi forsan eo referas, quando accedit lapsus termini legibus definiti, ut in querela inofficiosi lapsus quinquennii,

§. III.

Et potest & debet adprobari ordinarie omnis & quæcunque ultima voluntas, nam est unilateralis, ideoque, ut ex infra dicendis patebit, nullus testator cogere potest heredem aut quemcunque aut honoratum aut oneratum ad sequendum ultimum suum judicium *L. 16. C. de jur. delib.* sed, si illi exinde obligandi sunt, non potest non id fieri ex accedente sua voluntate obligatoria ad satisfaciendum testatoris voluntati, quippe quibus integrum est, oblatum lucrum quodcunque, aut injunctum onus, vel agnoscere & acceptare, vel repudiare.

§. IV.

§. IV.

Quænam sint personæ adprobantes, inquisituris attendendum est, hic plane non quæri de testatore s. disponente propriam voluntatem adprobante, quæ quæstio inutilis esset, nisi quis huc referre velit casum, quando is, qui testamentum alienum conscribit, sibi ipsi adscribat legatum, quippe quod a labe falsi, non nisi speciali testatoris adprobatione subscripta vindicatur, de quo *l. 1. C. de his, qui sibi adscrib. in testam.* sed potius omnis ille huc pertinet, qui in ultima voluntate aut honoratus aut gravatus est, quippe a cuius libero dependet arbitrio, se testatoris voluntati vel subijcere vel subducere, *L. 20. pr. l. 88. D. de acqu. vel om. her.* quod optime cohæret cum regula: illius est velle, qui potest nolle *L. 3. D. de R. I.* Adserto quidem huic maxime obstare videtur insignis ille testamentorum favor, de quo magno cum pondere pronunciat CICE-RO in *Phil. II. circa fin. inter publicas hominum actiones firmissimam legem esse, inter privatas sanctissimum testamentum*, quid quod *Nov. 22. C. 2.* vim legum ipsis testamentis tribuit, & rei interesse publicæ, suprema hominum judicia sortiri exitum, asseritur *L. 5. D. testam. quemadm. aper.* At enim vero in propatulo est, ultimas voluntates legem imitari maxime in herede necessario, quales olim servi & sui erant, quippe quibus summum erat nefas opponere sese voluntati dominorum aut patris: ipsum autem nomen heredis voluntarii ostendit, in hoc plane aliud obtinere, quippe cuius libertati voluntatem defuncti spernendi suoque forsan favori renunciandi in legibus expresse cautum, atque ex ea-

dem ratione legatarii arbitrio relictum est, s. adprobet & acceptet legatum s. illud repudiet, *L. un. §. 11. C. de caduc. toll.* Quodsi vero ultimæ voluntati intuitu heredis voluntarii s. alius honorati vim & effectum legis tribuere libeat, non nisi post factam adprobationem hoc fieri potest, post quam quod ab initio voluntatis erat, necessitatis effectum est sec. *L. 17. §. 3. D. commod. vel contra.* idque eadem ratione, qua omnibus conventionibus vis legis attribuitur, intuitu nempe promanantis exinde obligationis, nam qui semel lucrum ex ultima voluntate acceptat, ad onus eidem connexum sese obstrinxit, ut ex superius dato exemplo legatarii per adprobationem legati ad subeundum majus etiam incommodum se obligantis apparet. Adprobant etiam quandoque personæ in ultima voluntate maxime imperfecta directo nec honoratæ nec gravatæ, sic heres, qui prætertestamentum invalidum ab intestato ad successionem vocaretur, illud adprobando heredem testamentarium ad successionem admittit, quem improbando & jure suo utendo ab eadem excludere posset, utrumque & expresse & tacite fieri potest, v. g. si ab herede testamentario exigat, quod ipsi a defuncto debebatur, eo ipso illum qua talem agnoscit.

§. V.

Quum in jure plerumque maxima & minima in plurimis quæstionibus a regula recedant, prout docet Ill. BOEHMER in *Diss. de caus. arduis §. maj. C. 1. §. 6.* itaque nec hic inutile est inquirere, ad quam classẽ hæ adprobationes pertineant, indubitatum autem est, sæpius maximum adprobantis præjudicium subesse posse,

posse, ante omnia ex scitis Romanorum, ex quibus, ut infra ostendetur, adprobatio & aditio quantum minimum differebant & quandoque coincidebant, per hanc autem quis tanquam eadem cum defuncto persona ad quaecunque hujus debita obligabatur; & hodie quamquam multum remissum sit ab antiquo rigore, res ipsa tamen commonstrat, perquam plurimas ex approbatione in adprobantem redundare posse molestias, quia adprobans simpliciter ex sua approbatione tenetur, nunc vero ex eo præjudicio causæ magnæ a parvis discernuntur MENOCH. *de arbitr. jud. quest. Cent. I. Cas. 72. n. 10.* ac præterea inquirere in alienum patrimonium perquam intricatum, involutum molestumque est, ideoque & hic suo modo locum sibi vindicat generalis regula, quod in causis arduis & majoribus, quibus dubio procul sæpissime hæc approbationes adnumerandæ, caute & circumspicte agendum sit, quam stabilivit COTHMANN. *Vol. II. resp. 86. n. 16.* approbationemque fieri debere, probe prius apud animum reagitata & ponderata. Deinde quia est declaratio spontanea, hic absint omnia illa, quæ libertatem & consensum remouent; e diametro autem libertati repugnat vis, metus & omnis illegitima coactio, quæ si interverit, approbatio nulla est, eoque minus dubitandum adprobanti per restitutionem in integrum succurri debere, *L. 21. §. 5. D. quod metus causa. L. 85. D. de acq. vel omit. hered.* eadem ratione & dolus, quo quis ad adprobandum inductus ipsam approbationem reddit nullam, nec adprobanti deneganda actio de dolo *L. 40. D. de dolo malo.* Denique quum & error repugnet

libertati voluntatis, ut dicit *L. 116. §. 2. D. de R. J. L. 15. de jurisd.* quod errantis nulla sit voluntas, sequitur ultimæ voluntati per adprobationem, cujus caussa est error aut ignorantia, nihil plane accedere roboris, quo spectat si quis ex testamento, cujus nullitatem ignorat, legatum petat, *MENOCH. Conf. 162. num. 30.* quocum convenit *L. 62. D. de cond. indeb.* nec minus ex his concludere licet adprobationem ante inspectas tabulas nullius esse valoris, & *L. 6. D. de transact.* hic habere locum.

§. VI.

Dictum est §. 4. personas adprobantes omnes esse honoratos & oneratos, eorumque classes ipsa ultimarum voluntatum diversitas constituit, utque testamentum inter ultimas voluntates, ita heres inter personas adprobantes eminet. Inter heredes olim primi erant necessarii, quorum duplex est ordo, quidam vocantur necessarii, ratione institutionis, quorum jura & adhuc hodie in usu sunt, quo pertinent liberi absque nullitatis vitio haut prætereundi, alii ratione acquisitionis, in quos sc. hereditas ipso jure absque ullo eorum facto transibat, quales erant servi Romani, quibus nullo modo licebat improbare voluntatem dominorum, sed simplex incumbere necessitas adprobandi, §. 1. *J. de hered. qual. & diff.* quo eodem jure olim sui utebantur in adprobanda patris voluntate, §. 2. *J. eod.* Sed prætoris beneficio tandem his licebat abstinere *L. 57. D. de acqu. & om. hered.* hic attamen cum limitatione, ut impuberibus hæc abstinendi facultas quandocunque libera esset, puberibus autem non nisi, si se haut immiscue-

rant

rant, quibus deinde minoribus XXV annis, si appetierant damnosam patris hereditatem, prætor ex generali edicto de minoribus succurrebat. Voluntarii dicuntur & ratione acquisitionis & institutionis, illimitatumque erat eorum arbitrium vel acquirendi vel repudiandi hereditatem delatam, §. 3. *J. de hered. qual. & diff.* ac de his maxime hic sermo est, nam is dicitur approbare, qui & potest improbare.

§. VII.

Heredes porro sunt vel ex affe tales, vel ex certa portione, intuitu horum notandum, unius vel adprobationem vel improbationem alteri non præjudicare, quia quod omnes tangit ab omnibus debet adprobari, *L. 11. de Serv. rust. c. 29. de R. J. in 6.* alteriusque improbantis portio non potest non alteri adprobanti accrescere, *L. 31. 53. §. 1. de acq. vel om. hered.* itidem sunt vel primi, vel secundi s. substituti. Omnis adprobatio fit vel in favorem, vel præjudicium adprobantis, non tertij, fieri enim nequit nisi salvo hujus jure, sic heres institutus aut quicumque honoratus non potest adprobare ultimam voluntatem imperfectam in præjudicium heredis ab intestato, ad excludendam successione legitima. Omnibus in universum adprobantibus, s. sint heredes, s. legatarii, fideicommissarii aut donatarii m. c. hæc posita lex est, ut adprobationi vel improbationi suæ nullo plane modo contravenire queant, nam semel adprobatum non potest amplius reprobari, *L. 9. D. de neg. gest. & quod quis semel improbavit adprobare deinde nequit, L. 62. D. de solut.* itaque herede instituto ultimam voluntatem improbante,

bante, successio ab intestato statim locum habet contra testamentum destitutum, nec ille in præjudicium heredum legitimorum voluntatem suam postea mutare potest.

§. VIII.

Ad probationis igitur naturalis est effectus, ut adprobans teneatur simpliciter adimplere voluntatem adprobata, non solum quoad favorabilia, sed & quoad annexa ut plurimum odiosa & onerosa, & vi agnitionis adstringatur necessitate iuris, ad omnia ea subeunda, quæ in adprobata voluntate ipsi imposita sunt. Exinde necessario fluit nexu, ad adprobationem ultimæ voluntatis accedant omnia ea requisita, quæ adhibenda sunt in adprobante quocunque modo obligando, ideoque is tantum adprobat, qui aliis valide sese obstringere & vult & potest, quæ potestas ex legibus judicanda. Quum igitur in illis haut exiguus personarum numerus inveniatur, quæ potestate sese obligandi admodum restricta utuntur, quædam earum sunt in medium producendæ. Inter omnes eminet pupillus, qui absque auctoritate tutoris nullo modo obligatur, ideoque & deficiente hac, nec potest adprobare vel agnoscere ultimam voluntatem, *L. 8. D. de acq. vel om. hered. §. 1. J. de auctor. tut.* Porro quibusdam per curatores angusti satis limites se obligandi sunt præscripti, ergo nec hi præter consensum curatorum valide adprobant ultimam voluntatem, huc pertinent minor, prodigus auctoritate iudicis pro eo declaratus, item fœminæ iis in regionibus, in quibus curatore ipsis opus est ad perfecte sese obligandum, ut in Saxonia sancitum *Part. 2. Const. 15. vid. CARPZ. ib. Def. 5. seqq.* nec generatim ambigendum,

dum, cuilibet adprobanti competere eadem remedia, quibus uti potest alias ad infirmandam quamcunque obligationem & læsionem, ita pupilli & minores dubio procul gaudent beneficio restitutionis in integrum contra adprobationem in eorum præjudicium factam.

§. IX.

Objectum adprobationis §. I. definitum est omnis ultima voluntas, sub qua intelligitur omne testamentum vel publicum vel privatum, solenne & minus solenne, s. sit perfectum s. imperfectum, in qua perfectione dijudicanda respiciendum maxime a) ad testatorem, b) ad modum testandi, c) ad ipsam voluntatem, d) nec non ad qualitatem bonorum, de quibus per ultimam voluntatem ordinatum est. Ratione adprobationis inter perfectum & imperfectum nullum est discrimen, modo quis per priora sciens & volens adprobaverit ultimam voluntatem imperfectam, *L. 16. C. de Testam.* perindeque est, adprobatio sit vel expressa vel tacita, posthabitis quorundam obmotis; tacitam adprobationem in imperfectis pro invalida absque fundata ratione habentium, est enim taciti & expressi regulariter una eademque vis, *L. 13. §. 11. D. locat. cond.* nisi diserte in legibus aliud statutum sit, qualis contraria legislatio in hoc casu inveniri nequit, sed potius *Lex all. 16.* indistincte & generatim loquitur, nullumque dubium est, ultimam voluntatem nullam licet ab herede posse adprobari, quatenus nempe favori suo renunciare potest.

§. X.

Ratione effectus, adprobatio per priora fit vel in favorem vel in damnum adprobantis, prius evenit v. g. in

in herede ab intestato successuro, sed in testamento scripto, quod nullo visibili laborat vicio, quod heres adprobans utilissimum habet remedium Legis ult. C. de ed. D. Hadr. toll. eoque mediante, amputatis illis litigiis, quæ ipsi ab intestato successuro forsitan moveri poterant, levato quasi velo ad possessionem hereditatis pervenit. Hoc adprobationum genus ultimarum voluntatum imperfectarum haut ita frequens est, quoniam plerumque conjunctum est cum præjudicio hereditatis ab intestato, & proinde nullius valoris, frequentior est quæ conjunctim commodum & damnum vel in una adprobantis persona vel etiam legatariorum insimul secum habet, quo referenda cautela, quam suppeditat §. 2. *J. de L. Falc.* quamquam hodie propter *Nov. 115.* ex qua legata etiam ab intestato debentur, inutilis, quando heres in portione, quam L. Falc. ipsi dat, haut acquieturus simulat hereditatem repudiare velle, quo legatarios, quibus in hoc eventu periculum esset propter destitutionem testamenti legata plane amittendi, adigat, secum de ampliori et pinguiori portione pacisci. Num satis convenienter lex & cautio contra eandem simul a legislatore ferendæ sint, alii iudicent.

§. XI.

Quia ergo adhibitis legitime requisitis illis supra nominatis, ultima voluntas ab eo, qui liberum suarum rerum habet arbitrium, adprobata nec imprecari, L. 2. C. de *fideic. L. 16. C. de testam.* nec consensus declaratus revocari potest, L. 84. §. 9. D. de *leg. 1.* inde est, ut qui testamentum, in quo rite quidem sed inique & contra pietatis officium est exclusus ab hereditate ejus, qui ei

ei legitimam debet relinquere, quocunque modo s. expresse s. tacite adprobaverit, eo ipso a querela inofficiosi testamenti excludatur *L. 8. §. 10. L. 12. 23. 31. 32. D. de inoff. testam.* Ad eruendam vero tacitam testamenti inofficiosi adprobationem actus maxime urgentes requiruntur, quo pertinet, si inique exheredatus motu & nomine aut suo aut alieno, sponte sua, ex illo testamento aliquid petat, *L. 10. §. 1. L. 12. D. de inoff. test.* quamquam VINNIVS ad §. 5. *J. eod.* ut & CONNANVS cum ZOESIO aliisque existiment, non censi excludum a querela hac, qui nomine alieno quid ex testamento exigat, quoniam hodie legata etiam postquam testamentum pro inofficioso declaratum, nihilominus valeant, quibus satisfacit LAVTERBACH. *Exerc. forens. 15. §. 8.* Ab hac regula eximendi sunt, qui non sponte sua, sed necessitate officii coacti, aliquid ex eo testamento petunt, quales sunt tutores nomine pupillorum legata exigentes, in his enim duplex persona est consideranda, nec eis qua heredibus necessariis inique exheredatis obesse potest, quod qua tutores gesserunt, ac proinde integrum ipsis permanet jus proprio nomine de inofficioso conqueri, §. 4. *J. de inoff. test.* In genere perquam caute procedendum, si de adprobatione ultimæ voluntatis ad effectum excludendæ querelæ inofficiosi quæritur, quia hoc insimul involvit jacturam vel gravamen privilegiatæ maxime portionis legitimæ, ac in dubio licet filius v. g. rebus sui patris vi dispositionis testamentariæ se immisceat, hoc tamen factum censendum est salvo eo jure ex providentia legum ipsi competente & quæsito, GAIL. *Lib. 2. Obj. 120. n. 12.* nec opus est

est hoc in casu protestatione filii, quippe quæ regulariter in rebus dubiis obtinet, legitima autem illi debetur non ex arbitrio patris, sed necessitate legis, de quo JASON & ALEXAND. apud alleg. GAIL. a legitima enim quantum fieri potest omne onus rejiciendum, *L. 32. C. de inoff. test. avib. Novissima C. eod.* in quibus sedes est legis de non gravanda legitima. Quid vero dicendum de exheredatione bona mente facta? quæ est, si liberi non mala mente parentis exheredantur, sed ex alia causa, ut loquitur VLPIANVS *L. 12. §. 2. D. de bon. libert. f. exheredatio* quæ non notæ causâ sit ut vocatur in *L. 18. D. de lib. & postb. an & hæc testamenta tamquam inofficiosa possint rescindi, & ad eorum valorem adprobatio exheredati requiratur, anceps est quæstio, ultimum asserunt BALDVS aliique allegati a BERLICH. *Dec. 110. n. 2.* plerisque in alias euntibus partes, quoniam hic cessaret prohibitio gravandæ legitimæ, onusque impositum concernat favorem & utilitatem exheredatorum ALCIAT. *L. 1. Pres. 2. n. 3.* BARRY de Success. *L. 16. tit. 10. n. 7.* si expressa non extaret decisio in *L. 12. 25. C. de inoff. test.* non dubitandum esset, haut obstantem bona parentis intentione, liberis integrum esse querelam inofficiosi movere, quoniam quilibet favori suo renunciare potest, *L. 29. C. de pact.**

§. XII.

Testamentis aliisque ultimarum voluntatum generibus quum in jure Rom. earum fonte splendidus satis processus sit præscriptus, religiose & anxie ad unguem usque observandus, si intentioni disponentis effectus insanabilis nullitatis vitio haut impeditus respondet.

spondere debeat, non dubitandum heredem in imperfecto tali testamento institutum, aut quemvis alium in quacunque ultima voluntate imperfecta honoratum aut oneratum, voluntatem illam adprobare agnoscereque posse, eique adprobationi stare impositaque ipsi onera adimplere teneri *L. 16. §. 1. C. de testam.* hancque legem de ultima voluntate legibus haut conformi sed inutili & invalida disponere, nulla inter adprobationem tacitam & expressam admissa differentia, tantum non omnes uno ore asserunt MEY. *P. 7. Dec. §. n. 4.* Obstare quidem videtur huic asserto clara decisio *L. 21. §. 1. cit. tit.* ubi rescribitur, quod ex imperfecto testamento nulla proficiatur obligatio, quocum usus praxisque quotidiana conveniunt STRV. *S. J. C. Ex. 32. th. 16.* sed in hac *L. 21.* continetur solummodo regula, quam etiam ad ductum rectæ rationis aliam dare non licet, omne enim id, quod ad formam sui requirit certas solennitates in lege definitas, his deficientibus, non potest non pro inefficaci haberi ad obligandum, licet alii in foro conscientiae nihilominus adesse obligationem asserant, quos producit BRUNNEM. *ad L. 2. C. de fideic.* sed hæc regula maxime limitatur in *all. L. 16.* quando nempe heres imperfectum ejusmodi testamentum adprobaverit & insimul favori suo renunciaverit, ad quod adimplendum ex adprobatione sua tenetur. Verum ex his resultat quaestio magis dubia, majoribus dissensuum nubibus obvoluta, an heres, qui ex tali imperfecto testamento unum alterumve legatum solvit, etiam ad solutionem reliquorum pro obligato habendus sit. Sunt quidam, qui hanc quaestionem, sed haut

sufficientibus ex rationibus, affirmant, propter generalitatem *L. 16. C. de testam.* absque restrictione disponentis, & quia adprobatio unius capituli inferat approbationem alterius. MEY. *P. 7. Dec. 9.* Major est numerus negantium, quos inter maxime est SCHWEDER. in *Diff. de agnit. ultim. volunt.* quorum sententia eo reedit, majori hic cautione opus esse, & probe ponderandum, quousque facta illa pertingant, nam nullum actum ultra intentionem agentis operari, *L. 3. 8. 9. 19. D. de R. C.* ut clare decisum in alleg. *L. 16. § L. 1. 2. 23. C. de fideic.* quod legata inutiliter relicta eatenus saltem debeantur, quatenus heres ea agnovit, & quod ex facto colligitur non ultra limites illius facti producendum, nec ea, quæ voluntarie gerimus, ultra quam gerimus, extendenda, per alleg. a CEPHAL. *Conf. 377. n. 55.* positumque esse in arbitrio heredis, erga quos liberalitatis actum exercere, iisque gratificari velit, *L. 2. §. 2. D. de precar.* Maximum etiam huic sententiæ momentum accedere videtur ex *L. 88. §. 5. de leg. 2.* ubi casus, quando heres legata ex certo die relicta solvit, antequam venerit dies, & exinde haut teneatur & reliqua ante diem solvere: nec minus eidem patrocinari apparet, quod hi casus quando heres ex imperfecta voluntate legata aliaque præstat, secum habeant quædam de renunciatione favoris illius ex lege sibi competentis, a præstatione imperfectorum eorum onerum eum absolvente, ideoque strictius interpretandi. Negantes porro dicunt, quamvis *L. 16.* generatim loquatur, heredem obligari ad implendam agnitam voluntatem ultimam, non potest tamen non pro materia subiecta subintelligi, quatenus

tentus sc. adprobaverit, erroneumque esset simpliciter argumentari, quasi per adprobationem partialem unius alteriusve capituli inducatur adprobatio totius testamenti. Atque hæc sententia ut communis agnoscitur in *Consil. Marpurg. 24. Vol. I. n. 165.* eoque facilius in has partes transeundum videtur assentientibus sententiæ BRUNNEMANNI ad *L. 3. C. de Testam.* statuentis ex ejusmodi ultima voluntate imperfecta oriri obligationem imperfectam, licet lex solummodo non adsistat, idque in causâ esse, quare heres id quod solvit, ut indebitum condicere nequeat, & proinde hæc dispositio ultra id, quod solutum extendi non possit, quam sententiam & fovet MANTICA *Lib. 2. tit. 14.* communiter quidem Dd. hanc ponunt limitationem in annuis maxime legatis, quod per eorundem præstationem triennalem convalidentur etiam quoad futurum tempus propter *L. 1. C. de fideic.* sed plerique adjiciunt limitationem, si invaliditas orta sit ex defectu solennitatum atque quæstio sit de causâ favorabili, sicuti in hac *L. 1. de alimentis legatis MENOCH. L. 3. præf. 131. n. 5. SYRDVS de alim. tit. 8. privil. 22.*

§. XIII.

Atque hæc est communis ratio interpretandi & restringendi naturam & effectum adprobationis, cui BRUNNEMANNVM ad *L. 3. § 16. C. de testam.* habere patronum, facile suffecerit, nihilominus tamen ab omni dubitatione haud immunis, cujus quasdam producere rationes haut involupe erit. Ante omnia scrutandum est discrimen, quod sit inter adprobationem ultimæ voluntatis & acquisitionem s. additionem hereditatis

ipsam, prior satis superque definita, hanc autem arctissimo nexu cum illa cohærere omnes fatentur, & est declaratio de suscipienda hereditate delata, eaque mediante quis heres ut una cum defuncto persona efficitur, atque ad omne ejus æs alienum tenetur, *L. ult. C. de jur. delib.* Distinguenda sunt tempora, olim erat actus legitimus & fiebat plerumque per cretionem, vid. *VLPIAN. fragm. Tit. 22. §. 27. seq. AVERAN. Lib. 1. Interpr. Jur. C. 12. n. 5.* deinde autem cretionum solennitate sublata *L. 17. 18. C. de jur. delib.* dividitur in aditionem in specie talem, quæ verbis, & pro herede gestionem, quæ factis fit, *§. ult. J. de Hered. qual. & diff. sc.* illis, quæ alio quam heredis vel domini animo non fiunt, v. g. fervum hereditarium manumittendo, aut res hered. vendendo, *BRUNNEM. ad L. 1. 2. C. de inoff. test.* ideoque cit. *§. ult. J.* nervose dicit, pro herede gerere est pro domino gerere; requiritur maxime hereditas delata, quæ delatio in nostro casu fit per testamentum, & semel adita hereditas non repudiatur *L. 10. C. de jur. del.* Adprobationis differentiam maxime in eo quærunt, quod solummodo causa delationis maxime imperfecta agnoscatur & convalidetur, & adprobans ultra id, quod in tacita adprobatione dederit, non obligetur, *L. 1. 2. 23. C. de fideic.* Verum enim vero hoc jamdum quibusdam videretur malam arguere causam, quod de adprobatione agentes plerumque ad leges provocent, quæ aditionem habent pro objecto; porro quum hodie omnes asserant, aditionem simpliciter & nuda declaratione absolvi, *HILLIG. ad Don. Lib. 7. C. 8.* quis quæso invenerit differentiam inter expressam

sani testamenti maxime perfecti adprobationem & aditionem, quum & adprobanti a priori recedere non liceat; deinde si adprobatio solum causam delationis concernat, legibus plane repugnaret, quemquam ex sola delatione obligari, nam hoc est effectus aditionis, quem tamen & adprobationi tribuunt. Quoad tacitam adprobationem major est adhuc ambigendi ratio, & optime hic dici potest cum *L. 2. D. de jur. & facti ign.* quod facti interpretatio plerumque prudentissimos fallat, nec Oedipus sufficeret ad eruendum discrimen factorum, quæ adprobationem, & quæ pro herede gestionem involvunt, qui enim legata & fideicommissa solvit per sanam rationem non alio, quam heredis facit animo, adeoque per priora pro herede se gerit; sed dicis, adprobans obligatur solum quatenus solvit, pro herede gerens autem in totum; verum quoad *L. 1. C. de fideic.* illa adprobationis vulgari effectui magis, nocet, & si potest ad communes regulas reduci non est privilegium, *L. 2. 23. eod.* non disponunt de adprobatione testamenti, alias enim heres ex eadem cum legatariis imperfecta causa talis simpliciter teneretur ad legata, sed potius de legatis & fideicommissis ab herede ab intestato imperfecte relictis, ideoque ex principiis Romanis distinguebant, utrum legataolvere promiserit stipulando, tunc ex *L. 23. in integrum tenebatur*, aut vero nudo pacto vel simplici solutione, tunc ultra data non obligabatur & cessabat conditio indebiti, quia naturalem obligationem ex imperfecto testamento oriri putabant, ita rationes subducit *BRUNNEM. ad L. 23. C. de fideic.* & leges solum non adficebant

bant testamento ex præscripta forma non composito, id. *ad L. 3. inf. eod.* sed hæc ratio hodie cessat, quum eandem, quam stipulationibus tribuant vim, & pactis addicant, & quia taciti & expressi idem effectus, heres obligaretur in totum. Hoc eo magis adserendum si cum COLERO *Dec. 68. n. 12.* RICHTERO *Dec. 67. n. 26.* & CARPZ. *P. 3. C. 14. Def. 15. n. 13.* statueris hodie vix aditionem hereditatis requiri, quum ferme nullus existat casus, in quo heredi damnosa sit hereditas, & is numquam ultra vires hereditatis teneatur, hoc ipso confusa essent jura adprobationis & aditionis, & quæ de illa dicta sunt huic possent applicari.

§. XIV,

Lex Falcidia facultatem legandi ad quadrantem usque restringit, & heredi permittit quartam partem ut salvam habeat, legata imminuere, sed leges certos eximunt casus, quibus cessaret, inter quos est, si heres integra legata solvere in se recepit, idque vel epresso, si promiserit Falcidia se non usurum, quod vivo & consentiente testatore, legatariis valide promittebat, ad ductum *L. ult. C. de pact.* non autem ignorante testatore. *L. 15. §. 1. D. ad L. Falc.* WISSENB. *ad D. de condit. & dem. n. 24.* sed mortuo testatore simpliciter validum erat, *L. 46. 71. D. L. fin. C. ad L. Falc.* vel tacite, quando heres patrimonii vires perspectas satis habet, sed nihilominus adita hereditate integra solvat legata, quo casu nec solutorum datur conditio, quia sciens indubitum solvens donasse censetur, cujus nulla conditio, *L. 1. C. de cond. indeb.* nec, quod maximum, & reliquis legatariis non detracta quarta integra legata denegat, per

per Nov. 1. C. 3. quia heres per hanc primam solutionem ultimam defuncti voluntatem in omnibus adprobasse credendus, ideoque & reliquis legatariis ad integra legata tenetur, *Aurb. sed cum testator. C. ad L. Falc.* probe autem ponderanda restrictio, nisi inopinatum quid emergat, nam omnis adprobatio supponit sufficientem scientiam & informationem adprobantis, nec renunciatio ad non cogitata potest extendi, prætereaque & sana ratio ubique subintelligit clausulam, rebus sic stantibus, in jure can. expressam, c. 25. X. de jurej. Novum ejusmodi emergens est æs alienum, quod non nisi post factam solutionem legatorum ad notitiam heredis pervenit, haut deneganda igitur hoc in casu heredi repetitio non retentæ quartæ, L. 9. C. de L. Falc. Optime autem heres sibi cavere potest per protestationem, quæ conservat jus protestantis L. f. C. de usur pupill. MEV. P. 1. Dec. 14. & 219. Quum vero regulariter in dubio a Falcidia ad Trebell. argumentari liceat, nihil obstat, quo minus quæ dicta jam sunt de illa, etiam ad hanc possint extendi, & eodem modo hæc vel expresse vel tacita remitti queat: per generalem ultimæ voluntatis adprobationem non induci nec Falcidiæ nec Trebellianicæ remissionem, comuni Dd. calculo probatum, GALERATVS de renunc. 49. n. 7.

§. XV.

Titulos ex ultima voluntate acquirendi esse vel universales vel particulares, ex data earum divisione §. I. apparet, inter titulos particulares, ad quos tamquam speciem spectare & ea, quæ in genere de quacunque ultima voluntate prolata sunt, non est dubitandi ratio, eminet legatum, in quo proinde communis obtinet
D regula,

regula, legatarium posse vel acquirere vel repudiare legatum, quod & concludi potest ex definitione legati, quod sit donatio quædam, cujus acceptatio non potest non dependere a nutu honorati, semel vero acceptatum repudiari nequit, maxime si hoc non nisi cum præjudicio tertii fieri posset, ut si v. g. legatario pro certa legata quantitate injunctum, certam quamdam speciem tertio cuidam restituere, quod de omni legatario, qui legatum, cui onus impositum, scienter acceptat asserendum, *L. 94. §. 2. de leg. 2.* Idem multo magis affirmandum de donatione mortis causa, cui propter adjunctam qualitatem actus inter vivos acceptatio vivo donante accedat necesse est, donatarius itaque onus & conditionem, sub quibus res a donante in ipsum consentientem translata est, nullo modo evitare potest.

§. XVI.

Quæ hucusque prolata sunt, maximam partem spectant ad testamenta & ultimas voluntates vel in genere vel speciatim, quibus de solennitatibus ratione formæ aliquid deest; verum enim vero, hæc scrupulosa anxiaque solennitatum & formularum observatio non absolvit omnia, quæ in condendis ultimis voluntatibus attendenda sunt, sed per §. 9. maxime intuentium in ipsum objectum, de quo ultima voluntas disponit, quæ objectorum diversitas non potest non ex cujuslibet regionis more diversissimum jus intuitu validitatis & effectus ultimarum voluntatum producere, nam obigit quidem placitis Latii omnem fere Europam auctoritate sua implere, cuilibet tamen regioni singularia sua remanserunt instituta, quæ non nisi ex propriis

propriis suis principiis judicanda, ideoque ex statu & varietate juris circa res, quo pleræque gentes, maxime Germania nostra, utuntur a Jure Rom. diverso, ante omnia æstimandum, in quantum statuta in hoc potestas de rebus suis disponendi applicari queat, Lex enim sequitur naturam rei, circa quam fertur, & contrarium asserere idem est, ac quadrata miscere rotundis. Hoc olim mirum quantum affixisse patriam, quum J.Cti non erubescerent indistincte ad normam legum Rom. decidere negotia patria, quid quod publica, deinde restauratores & purgatores jurisprudentiæ patriæ admodum doluerunt, quos inter nominasse sufficit CONRINGIUM & SCHILTERIUM. Hæc fata experta sunt pacta successoria, maxime dotalia, quæ quum juri Rom. non convenirent, maluerunt J.Cti ea ad classem ultimarum voluntatum, in specie donationum mortis causa, detrudere, eodem modo bonis hereditariis affinxerunt qualitatem fideicommissorum, quem errorem magnus alias KNIPSCHILDIVS errat; ratio est, quod videntes effectus non penetrarent eorum causas, in jure Rom. illas quærentes. Quia itaque remanserunt multa domestica instituta, facultatem disponendi de plurimis rebus admodum coarctantia, servatæ veluti ex naufragio tabulæ, nantes in gurgite vasto, quibus ut plurimum per statuta cujusvis regionis contra imminentem a jure Rom. cladem cautum est, exempla quædam restrictæ per ultimas voluntates de rebus disponendi facultatis, nisi consensu eorum, quorum interest, adnectere liceat.

§. XVII.

Et sanæ rationi maxime convenit, neminem de re

vel in totum vel in tantum aliena disponere posse, & fundamentum illud jurisprudentiæ Rom. Leges XII. Tabb. expresse sanciunt: Paterf. utilegassit super familiæ pecuniæ tutelæve *sua* rei, ita jus esto, *VLP. IAN. fragm. XI. 14.* idem extat in *L. 120. D. de V. S.* uberius hoc argumentum agit *MANTZ. de testam. val. & inv. Tit. 6. qu. 12. n. 8.* ex formula igitur cujusvis regionis dijudicandum, quænam res vel plane non, vel non in totum sint possessorum in sensu juris Rom. propriæ, nec hoc tamquam peregrinum, & quod rerum cujusvis provinciæ diversitatem in totum evertere non potuit, pro norma est accipiendum, quamquam ea, quæ in illo de rei alienæ legato sancita sunt, suo modo adplicari possint, quo pertinet *§. 4. 7. de leg. L. 74. D. de leg. 1. L. 1. pr. de leg. 3.* nec non optime fundata regula, quod nostrum, sine facto nostro ad alium transferri nequit, *L. 15. de R. I.* Quoad Germaniam, inter omnes constat, summam patrimoniorum divisionem & fuisse & partim adhuc esse, quod illa consistant in bonis vel feudalibus vel allodiis, ut hodie efferunt *Lehn und Erbe*, de priorum natura & indole nulla est lis; verum quoad hæc magna olim fluctuatio, sed hodie sub eorum nomine plerumque intelligunt bona avitæ *Stamm-Güter*, moribus & legibus patriis pro conservandis familiis optimo consilio stabilita. Ipsius vocabuli derivatio optime ex populari idiomate septentrionalium gentium petitur, quod habent *LOCEN*. in *Lexico Sueo-Gorb.* ut & *STIERNHOECK C. 2. de jure Sueon. & Gorb. vetusto*, ipsam rem cum *MARTIALI 10. Epigr. 27.* definire possumus: *Res non parva labore, sed relicta*, perpetuo enim opponebatur allodium acquæstui & propria industria acquisitis, & plerumque inter eorum requi-

requisita ponunt, ut sint immobilia, COTHMAN. *Lib. 3. Resp. 11. n. 24.* De his dubio procul intelligendus textus *Juris Prov. Sax. Lib. 1. art. 34.* quem vulgaris interpret ita fittit: sine licentia judicis potest quis suam alienare proprietatem, dum ab heredibus consensus præbeatur, idem & dicit *art. 52.* sed voculi proprietas admodum turbavit conceptus, quum advocaverint postea statuta Rom. de proprietate, quippe quibus portenti loco est illud, de proprietate disponere non posse. Quum itaque hodie res sit clara, bona avita esse in dominio totius familiæ, ex quo nomen fideicommissorum inconvener licet illis datum, hoc canonis loco habendum: de bonis allodialibus & avitis præsens possessor nullo modo disponere potest, nisi cum consensu agnatorum familiæ, hocque non accipiendum forsan de disponendi facultate per ultimam voluntatem, quippe quarum usus sero Germanis innotuit solennis, qui etiam nihil magis a rationibus suis alienum putabant quam generatim dispositiones moribundorum, & ad has averruncandas præscripta habebant certa valetudinis experimenta, subeunda ab iis, qui quæcunque bona etiam mobilia in alterum transferre volebant, quæ exhibentur in *J. P. S. alleg. art. 52.* ut & in *Weichbild. art. XX. n. 30.* nec non *jure Suev. C. 379.* sed de dispositione inter vivos s. traditione, cujus antiquam formulam habet BALVZ. *Lib. IV. Capitul. c. 19.* eique plerumque actus quidam symbolici accedebant, quos ex antiquitatibus declarat Ill. BOEHMER. in *Jur. escl. tit. de Instit. §. 6. seq.* exinde ipsæ conventiones de transferenda re plerumque vocatæ sunt traditiones, quarum ingentem numerum exhibet SCHANNAT. in *Corpore tradis. Fuld.* sed haut facile quam inveneris, quæ

quæ non expressam consensus agnatorum mentionem injiciat.

§. XVIII.

Ex his facile constat de maxima differentia successionis Romanæ & Germanicæ, illis enim successio voluntaria regula erat, nisi paucis exceptis personis, intuitu quarum erat necessaria, & dependebat ex nutu possessoris, cui res suas tribueret ultimo elogio, sed his multi casus sunt successionis necessariæ ex ipsa rerum qualitate oriundæ, propter quam non est in possessoris arbitrio, cuinam relinqueret sua bona, sed aut pactis successoris, quæ Germani nullo non tempore religiose observarunt, *СТРѢК. de succ. ab incest. Diff. VIII. C. 1. §. 4.* aut legibus determinatum, ad quem illa bona transirent, nec ultimo possessori integrum est unum alterumve migrare, ac proinde exulat dispositio per ultimam voluntatem tamquam unilateralem nisi consentientibus illis, quibus aut pactis aut legibus jus erat quæsitum. Regula generalis est successionis in bona feudalia & avita, quod non ultimo defuncto, sed primo acquirenti, qui rem in familiam, in qua nunc est, transtulit, succedatur, ideoque hæc bona dicuntur venire ex pacto & providentia majorum, quod idem & usu venit in successione in regna & principatus, proximior enim succedit non ex testamento ultimi, sed ex legibus reip. & jure proprio, ut ostendit *ZIEGLER ad GROTIUM de J. B. & P. L. 2. C. 7. §. 12.* Concluditur proinde, testamenta de ejusmodi rebus, quæ ignorant dispositionem possessoris, nisi accedente eorum, quorum interest, consensu, absque hoc plane nulla esse. Hunc in censum referri possunt Testamenta de feudo antiquo,

ex generali prohibitione 1. *Feud. 8.* nisi accedat consensus domini directi non solum, sed & agnatorum, vult *3. Conf. Marp. Vol. IV. Conf. 26. n. 310. & 473.* de quo plane non dubitatur, quia naturæ feudorum e diametro repugnant, quæ ab initio nihil erant nisi salaria pro servitiis præstita, nec vasallus hodie majori quam domini utilis jure utitur, & feuda plerumque adquirenti conceduntur pro se & suis descendentiis habilibus, quibus jus exinde quæsitum non nisi consentientibus inverti potest, idque eo minus mirandum, quum in genere vasallo non competat jus absque consensu domini & agnatorum in feudo aliquid mutandi, sic in principatibus Germ. etiam hodie requirunt consensum domini, sc. Imperatoris & agnatorum, ad introducendum jus primogenituræ *SPRINGSFELD. de appanag. Cap. 5. n. 48. & 59. BETS. de pact. illustr. fam. Cap. ult.* Bona avita & hodie imitari conditionem feudalium apprimè satis asserunt *BERLICH P. 2. Concl. 13. n. 8. MODEST. PISTOR. Vol. 2. Conf. 50. n. 22.* propter eandem de illis disponendi facultatem restrictam, quæ ex eadem successionis necessariæ ratione orta est, quia item ut in feudis non ultimo defuncto, sed primo acquirenti succeditur jure proprio & condominii totius familiæ, ob quod facultas per ultimam voluntatem ordinandi non potest non exulare, nisi accedente consensu agnatorum, quorum subest præjudicium, allegati supra textus hoc clare innuunt, & pro conservando hoc antiquo ritu tam innumera extant pacta familiarum, omnem alienandi potestatem possessoribus adimentia, nec non multorum locorum statuta eidem cautum, ut in jure Hamburg. & Lubec. in quibus bona hereditaria accurate satis ab acquisitis discernuntur, vid. *Jur Lubec. Lib. 1. tit. 10. art. 6. & MEYIVS ad b. l. GISEBERTVS in peric. statut. harmon. Part. 2. art. 33.*

§. XIX.

Aliud successionis necessariæ exemplum est intuitu conjugum, quam necessitatem modo leges modo pacta producunt, maxime dotalia, quorum per omnem Germaniam usum asserit *STRYK. de succ. ab int. Diss. VIII. C. 5. §. 1. cum alleg.* turbata tamen admodum sunt per Juris Rom. introductionem
ut

ut supra dictum, quod hæc pacta successoria plane horret, nec ex dotalibus hereditates deferri patitur, *L. 5. C. de pact. conv. sup. dot.* Distingunt hodie an per modum pactorum an vero per modum ultimæ voluntatis inita sint, quod ultimum ex numero testium & contentorum ad dispositionis m. c. naturam inclinantium tenore colligunt, unoque ore affirmant, hæc pro lubitu revocari posse, *CARPZ. P. 2. C. 43. D. 10.* Exinde quoque ortum habet quæstio de facultate mutandi testamentum reciprocum inter coniuges, quam *BRUNNEM. Cent. 2. Dec. 24. id. ad L. 22. D. de leg. 3. ex principiis Latii*, in quibus tamen difficile erit exemplum hujus generis proferre, adfirmamandam credit, *CARPZ. P. 3. Const. 2. Def. 13. n. 7.* pro negativa militante, eo in casu maxime si uxor subscribendo consensum præstiterit dispositioni mariti, de ejus bonis in utilitatem liberorum ordinantis. Quoad leges, illas in quavis regione singulares habent, successionem conjugum inter se ordinantes, ex quo prodiit nomen portionis statutarie, quam plerique agnoscunt effectum antiquæ communionis bonorum, quæ olim per omnem obrinuerit Germaniam, atque ideo nullus est, qui dubitet, nulli conjugum esse potestatem hanc portionem legalom alteri invito aut imminuendi aut adimendi nisi consentienti, *COTHMANN Vol. 1. Conf. 74. GAILL. 2. Obs. 87. n. 17. BERLICH. P. 3. Concl. 9. n. 15. seq.* exemplum est in femina Saxon. quæ marito successionem in bona mobilia nullo modo invertere potest, ut expresse constituit Elector August. *P. 3. Const. 7. v. CARPZ. ad eamd. D. 7.* nisi si illa in pactis dotalibus sibi de iis disponendi facultatem reservaverit, *id. Def. 13.* quilibet enim favori pro se introducto renunciare potest, & actus, qui in favorem alterius nullus est, ad evitandum illius præjudicium, illo consentiente sustinetur *L. 14. C. de procur. & ibi DD.* quod & idem intuitu successionis pactitæ asserendum est, quippe cujus unus quid quod major quandoque favor est inter Germanos, qui successionis testamentariæ, quam illa non solum hanc, sed & eam ab intestato cessare faciat, ut in pactis ganerbinatum videri potest, ideoque & idem interpretandi principium hic locum habet, quod extat in *C. 6. X. de donat.* in contractibus ple.

plenam, in testamentis pleniorē, in beneficiis plenissimam interpretationem adhibendam esse: nec notatu injucundum eodem odio, quo Romani pacta successoria, e contrario favore ultimas morientium voluntates prosequerantur, Germanos inverso ordine eo odio ultimas voluntates, & favore pacta successoria prosecutos esse. Ac proinde successiones maxime inter conjuges secundum normam initorum pactorum ordinandæ sunt KOHL. *de pact. dot. P. 2. n. 81. seq.* extante vero testamento, præcipue de consensu alterius conjugis an accesserit quærendum, si de ejus præjudicio agitur.

§. XX.

De consensu liberorum gravata per ultimam voluntatem portio legitima §. 11. dictum, in jure Rom. illum perquam arctis limitibus circumscriptum esse, nec ex generali testamenti approbatione colligendum, maxime vivente adhuc patre promissa facta de non detrahenda legitima pro nulla declaratur in *L. 35. §. 1. C. de inoff. test.* nec eo jure differentia est inter filios & filias, licet quoad has DD. sapius doti tribuerint favorem portionis legitimæ: verum quoad patria jura certum est, & leges antiquæ loquuntur, filias exclusas fuisse a successione maxime in bona immobilia, & proinde legitimam Romanam ignotam plane fuisse, eisque præter dotem ex bonis paternis nihil competiisse, quas leges producit PAGANINVS GAVDENTIVS in *Diff. de success. famin.* GVNOLING. *Diff. de renunc. hered. filiar. illustr. C. 1. §. 12.* nec non Ill. quondam Cancell. de LVDVVIG in *Reliq. MS. T. VII. l. 2. P. 1. c. 27.* ad conservandos quos mores condita sunt pacta inter familias illustres & nobiles, quibus determinant successionem feminarum, cum conservatione bonorum hereditariorum, restringuntque testamentorum usum, quale pactum commune nobilitatis immedie in circulis Suevico, Franconico & Rhenanis erat apud LVNIG. im teutschen Reichs. *Archib. P. spec. Contin. III. p. 14. n. 7.* inde & ortum traxerunt renunciationes filiarum successionis in bona parentum, de quibus fusc alleg. STRTK. *l. 2. C. 10.* quæ ex veriori sententia valde essent absque omni juramento, quæ regulatiter nihil nisi jux antiquum contineant & confirmet, sed amor juris communis accessionem juramenti produxit, cujus inevitabilem necessitatem defendunt CARPZ. *P. 2. C. 35. D. 6. CHRISTIN. V. 1. D. 179. n. 9. aliquæ,* quia crederent legitimæ vivo patre renunciari aliter non posse nisi accedente hoc vinculo religioso, quod quum in *C. 2. de pact. 6.* sanctum sit, & hodie si non necessitatis, tamen consilii est.



NOBILISSIMO AC CLARISSIMO
DN. DOCTOR ANDO

S. P. D.

D. RVDOLPH. CHRISTOPH. HENNE,
INSTITVTIONVM IMPERIALIVM PROF.
PVBL. ORD.

Neminem in admirationem rapere debet, per plures illorum, qui nostra aetate legum studio operam navant, votorum suorum non compotes fieri, alii enim in pertractandis literis, quæ ab humanitate nomen ducunt, iusto remissiores sunt, easque tantum primis, ut ajunt, labris degustant, alii magis corticem quam vim & potestatem legum sequuntur, alii solummodo quid fori usus seruet, sibi curæ cordique esse sinunt, paucissimi vero mediis, quibus animus solida juris peritia & prudentia imbuatur, utuntur. Horum quoque Tu Clarissime Candiditate vestigia undique premenda putasti, nihil enim Tibi prius, nihilque ab incunte aetate antiquius fuit, nisi ut majorum Tuorum, nimirum Proavi, Avi & Parentis, (quorum in Academiam nostram egregia merita, nulla unquam delebit oblivio) exempla Tibi ob oculos ponerer. Enimvero per aliquot annorum spatium in iis quæ jurisprudentia adjumento & ornamento sunt Te abdidisti, quæ in celeberrimorum virorum sebolis, iusto ordine & non interrupta serie frequentatis, audivisti, in succum & sanguinem convertere Tibi voluptati fuit, quam ob rem hoc solummodo reliquum est, ut rationes solertiae Tuae publice edas, & studiorum Tuorum fiducia fretus, specimen Tuum inaugurale, (quod multi reformidant) sine Praeside defendas, de quo conatu non solum Tibi latus gratulor, sed etiam in votis habeo, ut honores quibus mox ornandus es, cedant in reipublica commodum. Tui ornamentum, novisque in dies felicitatis accessionibus occasionem præbeant, Vale. Erfordiae d. XXVI. Maji MDCXLVI.

* * *

FACULTATIS IURIDICÆ
DECANVS,
HENRICVS MELCHIOR
SCHÜTTE, JCTUS,

MEMORATÆ NEC NON PHILOSOPHICÆ
FACULTATIS ADSESSOR, IUR. AC PHI-
LOS. PROF. PVBL.

LECTORI BENEVOLO

S. P. D.

ERFORDIÆ,
Typis JOH. CHRISTOPHORI HERINGII,
Acad. Typogr.

1000



Hereditatem vel per testamentum, vel ab intestato, interdum quoque, præsertim hodie, per pacta deferri, tralatitium est. Complures tamen testamentarias dispositiones e republica ex-turbatum iuerunt: causantes, ex dominio quidem fluere facultatem alienandi inter vivos, sed cum quis moritur, non amplius ad illum spectare res illas, quæ vivis solis in-servire queunt, adeoque perperam de his disponi in ca-sum, quo dominium amissum est; admissoque testamen-torum jure, nunquam defuturos, qui testamenta nulla ac inofficiosa condant, imo falsa supponant, hincque li-tes in judicium crucem, litigantium damnum, & causidi-corum lucrum, nunquam intermorituras esse. Ac pro-fecto, iudices nullæ fere quæstiones magis exercent fa-tigantque, & ad panem lucrandum causarum patronis magis faciunt, quam de hereditatibus & ultimis volun-tatibus. Sic Baldus subinde de se professus est, quod de sola substitutionum materia consulendo, ultra 15000. du-catorum consecutus fuerit. HEINECC. *Elem. jur. civil. sec. ord. ff. libr. 28. tit. 1. §. 1.* JAC. FRIDER. LVDOVICI *Histor. Pand. §. 8.* Sed salva res est. Nulla enim vis esset domini, nisi domino liceret ejusmodi quid sancire, quod etiam post mortem ejus valeret. Ecquis quoque non triste atque lugubre fateatur, cum sui patrimonii juris-que universi expectare successorem, qui legum, heredi-

tates deferentium, fiducia fretus & audax, proterve contemnit ac negligit sanguine proximum, nec posse iudicio supremo his bona relinquere, qui vel plane extranei, beneficiis cumularunt, aut jugi obsequio multisque amicitiae tesseri sibi paraverunt successionis spem. Neque dubium, quin ad tuendum augendumque patrimonium alacriores longe sint futuri mortales, si facultates suas possint illis relinquere, quos maxime diligunt; contra vero in otium, luxuriam, dissipationem, profusionem rerum prout admodum, nihil sæpe magis in votis haberi, quam ut cum vitæ sine bonorum quoque finis sit, si illa suis propinquis ad successionem a lege vocandis invident omnimodo, nec ulla ex parte cupiant quaesita, neque tamen testamento eos a sua possint hereditate depellere. Præterea propter testamentorum abusum, non statim eorum usus est tollendus. Accedit, quod contra testamentorum abusum varia in jure prodita sint remedia, nullitatis ac inofficiosi querelæ, pœnæ in falsarios statutz, & quæ sunt ejus generis alia. JO. VOET. *Commentar. ad Pand. libr. 28. tit. 1. §. 2.* Testamentum, missa hujus vocis etymologia, quod quasi *testatio mentis* sit, pr. J. de *testam. ordin.* explosa a GEORG. BEYERO h. t. 2. Icto MODESTINO describitur *per voluntatis nostræ justam sententiam, de eo, quod quis post mortem suam fieri velit. l. 1. ff. qui testam. fac. poss.* Licet jure Romano, de universitate bonorum testamenta fieri debuerint, nec paganus pro parte testatus, pro parte intestatus decedere potuerit l. 74. ff. de *hered. inst.* tunc tamen se res habet jure Germanico statutorio. Quodsi enim hoc jure, de bonis acquisitis, vel mobilibus, defunctus tantum testatur, in his succedunt heredes testamentarii, in hereditariis vel immobilibus vero heredes ab intestato; ideoque non repugnat, defunctum, partim testatum, partim intestatum decedere. STRYK. *Us. mor. ff. libr. 28. tit. 5. §. 5. & 8.* TOB. JACOB. REINHARTH *sele F. Obs. ad CHRISTINÆ decis. Vol. I. Obs. 77.* Pluribus argumentum hoc JO. GOTTL. HEINECC. *dissert.*

differet. singulari de testamenti facillione jure germanico arctius pas-
sum limitibus circumscripta persecutus est. Deinde, cum
 testamentum vocetur *justa*, id est, solennis voluntatis no-
 stræ sententia: consequens est, ut solennitates omnes ob-
 servari oporteat, nullaque sine periculo nullitatis possit
 prætermitti, l. 17. l. 25. C. de *fideicom.* Solennitates vel
internæ sunt, vel externæ, atque hæc posteriores varix.
 Sed nova forma condendi testamenta, coram Parocho
 & duobus testibus, a Summo Pontifice, ALEXANDRO III.
in c. 10. X. de testam. & ult. volunt. præscripta est. In Bel-
 gio idem prope observatur, & Notarius cum duobus testi-
 bus sufficit. Alibi sufficiunt duo Senatores, licet non publica
 Senatus auctoritate ablegati, imo cives duo possessionati,
 si Senatores haberi nequeant. GEORG. BEYER. *Posit. ad ff.*
libr. 28. tit. 1. JO. ZACH. MARTMANN. de juris Canonici te-
stamento Lubec. testamenti causa. Secundum consuetudi-
 nem ergo singulorum locorum rite facta testamenta, ubi-
 que valent, etiam ubi diversæ solennitates receptæ sunt,
 vel jus civile observatur. GAIL. *libr. 2. Obs. 123. JO. 2 SAN-*
DE decis. Fris. libr. 4. tit. 1. des. 14. HEINECC. Elem. jur. civil. sec.
ordin. inst. libr. 2. tit. 10. §. 500. Quorum sententiam alii
 temperant, eamque quidem admittunt de rebus mobili-
 bus, quæ personam, cujus ossibus coherent, sequuntur:
 immobilium vero intuitu ad leges loci, ubi sita sunt, in
 condendo testamento respiciendum esse, censent. Sed re-
 cte distinguit VINNIVS *libr. 2. select. quest. cap. 19.* inter
 formam seu ritum disponendi, & rem ipsam, de qua dispo-
 nitur. Quæ enim in rem concepta sunt statuta, rem
 quoque afficiunt, eamque, ubicunque est, legibus fori rei
 sitæ subjiciunt: e contrario statuta actus tantum solenni-
 tatem definiunt, neque rem, neque personam dispen-
 tis afficiunt, sed formam solum actus determinant. In
 omnibus vero actibus valide expediendis ad solennia lo-
 ci, ubi geruntur, respiciendum est. l. 6. ff. de *Evist.* JO.
 GOTTF. SCHAYMBURG. *Annot. in Struv. libr. 2. tit. 15.*
apb. 14. Cumque nihil sit, quod magis hominibus debea-
 tur,

cur, quam ut supremæ voluntatis, postquam jam aliud velle non possunt, liber sit stilus, & licitum, quod iterum non redit arbitrium l. 1. C. de sacrosanct. eccles. Imo publice expediat, suprema hominum judicia exitum habere l. 5. ff. testam. quemadm. apert. utique testamentorum favor tantus est, ut in dubio interpretatio fieri debeat pro sustinenda ultima voluntate. CASP. MANZ. *Special. in jur. comm. vor. ult. volunt. & testam. sustin. favor.* ubi ad specialia descendit, & singularia adfert. In praxin, æquitatem pariter ac iustitiam cit. c. 10. X. de testam. inquirerem, nisi mihi etiam facere constituisset

NOBILIS ET CLARISSIMVS
JVRIVM CANDIDATVS,

DN. JOANNES DAVID
STENGERVS,

qui recitatione solenni, quam lectionem cursoriam vocant, illud illustrabit. Ubi hic sit natus, qua ratione educatus, sub quibus in literis & legibus profecerit, commemorare fas est. Lucem primam heic Erfurti die 27. Februar. anni hujus seculi vigesimi primi adspexit. Patrem veneratus est Dominum VOLCKMAR. WILHELM. STENGERVM, in perantiqua nostra academia Hierana Politices Profess. Publ. Ordinar. & Facult. Philos. nec non totius Universitatis Seniozem, Collegam olim meum conjunctissimum & desideratissimum, cujus vitam & insignia merita, in *Erfordia literata*, descripsit compater meus & amicus in paucis olim carus, celeberr. MOTSCHMANNVS: matrem vero BARBARAM DOROTHEAM, CHRISTOPH. WELZII, mercatoris quondam hujus urbis famigeratissimi filiam, post paucos a puerperio dies, sibi præmatura morte ereptam etiamnum luget. Literis, quæ ab humanitate nomen acceperunt, tam in schola Prædicatorum, quam in Gymnasio nostro Senatorio, operam navavit sedulam: ac cum ex ephebis vix excessisset, luculenta edidit ingenii fidelicioris & avi-

tæ virtutis documenta, cumque in juvenis & equis sit
 patrum virtus, nec imbellem feroces aquilæ columbarum
 progenerent, suo exemplo comprobavit, fortes creare
 fortibus & bonis. Academia patriz anno MDCCXXXVII.
 nomen suum dedit, ac scholas philosophicas affinis opti-
 mi, Professoris JVSTI CHRISTOPHOKI MOTSCHMANNI
 frequentavit. Hoc vero, elapso nondum semestri, ad
 manes majorum concedente, in vicinam academiam Sa-
 lanam se contulit. Ubi non tantum prælectionibus stil-
 cultioris latini, philosophicis, mathematicis & historicis
 summe Rever HALLDAVERI, excellentissimi HAMBERGE-
 RI, celeberrimorum Doctorem, SCHIERSCHMIDII, DAR-
 IIS & consanguinei FUCHSII, ac Philosophiæ Magistri
 clarissimi, WEGNERI, sed etiam Patruelis sui, Jurum Do-
 ctoris egregii, GEORGII PHILIPPI STENGERI, cujus sum-
 mam diligentiam ac plane paternam fidem laudat, recita-
 tionibus in universum jus civile, Canonicum & praxin
 fori, & quidem iteratis vicibus, nec non MOTERI in insti-
 tutiones juris, magno cum fructu interfuit. Juris vero
 publici & feudalis notitiam magni nominis viro, JO. GEOR-
 GIO ESTORI, acceptam refert, ac artem referendi ex actis
 judicialibus viro longe celeberrimo, JO. GOTTFR. SCHAVM-
 EYRGIO, debet. Exaucto ibidem triennio, Triumvirorum
 illorum de omni jure optime meritorum, JO. PETR. A
 LYDEWIG, JVSTI HENN. BÖHMERT, & JO. GOTTF.
 HEINECCII fama, quæ per omnium ora volitabat, cum
 in academiam Fridericianam pertraxit, ac duobus priori-
 bus integro biennio usus ducibus, juris publici, canonici
 ac civilis amplissimum campum, una cum iis, quæ ad
 praxin pertinent, ne aliquando cruda studia in forum
 propelleret, denuo emensus est: spem vero atque expec-
 tationem, quam de HEINECCIO perdiscendi juris Germanici
 causa, conceperat, mors ejus inopinata fefellit ac frustrata
 est. In patriam redux, non sotadici & fescennini argumenti
 carmina Milesiasque fabulas evolvit, sed ea, quæ in collegiis
 audivit, in succum, quod ajunt, & sanguinem convertit, ac
 præstan-

præstantissimorum juris interpretum commentationes diurna nocturnaque versavit manu. Tandem apud nostrum ordinem nomen suum est professus, ac, ut ad rigorosum admitteretur examen, modeste petiit. Annuimus votis honestissimis, ac textus ex utroque jure, qua canonico, qua civili, cum eo communicavimus, quos doctæ non solum resolvit & enodavit, sed & in ipso examine talem se nobis ubique probavit, ut omnium congratulationum suffragiis, dignus judicatus fuerit, cui cathedra juridica aperiretur, & summi in utroque jure honores, in tantorum feliciter exultatorum laborum austeramentum, decernerentur. Ea de causa, proximo die Jovis, *in c. 10. X. de testam.* commentabitur, ac dissertationem inauguralem

DE VLTIMA VOLVNTATE ADPROBATIONIS ET CONSENSVS INDIGA

a dissentientium dubiis, & quidem sine Præside, vindicabit. Quos actus solænes, ut Magnus Dominus Academicæ Rector, nec non reliqui Academicæ Proceres ac cives, honorifica sua præsentia illustriores ac splendidiore reddere velint, & ordinis nostri & meo nomine, ea, par est, observantia & humanitate, oro rogoque. Public. sub sigillo Fac. Jurid. Dominica Exaudi A. O. R. MDCCXLVI.



A 11470895